



Dugogodišnja istraga SIPA-e rezultirala je podizanjem i potvrđivanjem optužnice protiv 32 osobe – hronologija događaja



Dugogodišnja istraga policijskih službenika Državne agencije za istrage i zaštitu (SIPA) i drugih partnerskih agencija u Bosni i Hercegovini rezultirala je podnošenjem optužnice Posebnog odjela za organizirani kriminal, privredni kriminal i korupciju Tužilaštva BiH, u predmetu kodnog naziva „Lutka“, protiv 32 osobe, pripadnike organizirane kriminalne grupe Darka Eleza, koju je Sud BiH potvrdio 4.9.2013. godine.

Na području Sarajeva i Istočnog Sarajeva, usljed narušenih međukriminalnih odnosa, te želje za prevlašću nad teritorijom na kojoj su djelovali, kao i pasivnosti policijsko-pravosudnih struktura vlasti, od 2004. godine formirane su organizirane kriminalne grupe, koje su svojom brutalnošću i beskrupuloznošću a ujedno i organiziranošću, prevazišle dotadašnje poznate načine kriminogenog djelovanja. Ovo je za kratko vrijeme rezultiralo velikim brojem teških ubistava, razbojništava, iznuda, izazivanjem opće opasnosti, nasilničkog ponašanja i drugih kriminalnih radnji. Svi naponi u radu policije i donekle okružnih i kantonalnih tužilaštva, nisu doprinijeli stavljanju situacije pod kontrolu, a posebno nakon oslobađajuće presude Okružnog suda Bijeljina za počinjeno dvostruko ubistvo bračnog para Todorović na Palama, za koje su bili optuženi, tada nosioci kriminalnog djelovanja na području Istočnog Sarajeva, Đorđe Ždrale, Boris Govedarica i Miroslav Škobo.

Poslije njihovog oslobađanja, dolazi do otvorenog sukoba Ždraline kriminalne grupe sa suparničkom grupom koju je organizirao Darko Elez, što je naknadno rezultiralo većim brojem ubistava i pokušaja ubistava, izazivanjem opće opasnosti, ucjena, iznuda i drugih nezakonitih radnji. Svaki član kriminalne grupe Đorđa Ždrala i kriminalne grupe Darka Eleza, zajedno sa njihovim organizatorima, neposredno je učestvovao u vršenju krivičnih djela.

Ove kriminalne grupe nisu spontano nastale, nego su formirane radi izvršenja konkretnih krivičnih djela, gdje je svaki od članova imao formalno definiranu ulogu, čije je kontinuirano kriminalno djelovanje opasno zaprijetilo narušavanju sigurnosnog stanja Bosne i Hercegovine, te ozbiljno ugrozilo sigurnost svih njenih građana.

Početkom 2006. godine, nakon dramatičnog apela Kolegija Okružnog tužilaštva u Istočnom Sarajevu, a na inicijativu Državne agencije za istrage i zaštitu, formirani su zajednički istražni timovi, koje su činili najbolji istražitelji Državne agencije za istrage i zaštitu, Ministarstva unutrašnjih poslova Republike Srpske i Ministarstva unutrašnjih poslova Kantona Sarajevo. Ovi istražni timovi rad su započeli uz nadzor i naredbe Tužilaštva BiH, a sve s ciljem otkrivanja i rasvjetljavanja do tada počinjenih teških krivičnih djela i privođenja njihovih počinilaca pred nadležne pravosudne institucije.

Dugogodišnje iscrpljujuće zajedničke istrage u predmetima kodnih imena „Jahorina“, „Kargo“ i „Lutka“, rezultirale su razbijanjem organiziranih kriminalnih grupa koje su organizirali Đorđe Ždrale, Zijad Turković i Darko Elez, te privođenjem njihovih organizatora pravosudnim organima BiH, koji su ih procesuirali ili će tek protiv njih biti provedeni sudski postupci zbog počinjenih krivičnih djela ubistava, razbojništava i dr.



Rad na predmetu kodnog naziva „Lutka“ neprekidno je trajao od početka 2006. godine, kada je počelo prikupljanje relevantnih operativnih saznanja i dokaza, vršenje uviđaja na licu mjesta krivičnog djela, te saslušanje velikog broja oštećenih osoba i svjedoka. Početkom maja 2012. godine rad na ovom predmetu je intenziviran i tada dolazi do konkretnijeg prodora istražnih organa u kriminalnu grupu i prikupljanja neoborivih dokaza, na bazi kojih je isplanirana operativna akcija provedena 12.9.2012. godine.



U navedenoj akciji na području cijele Bosne i Hercegovine, uz učešće više od tri stotine policijskih službenika SIPA-e, MUP-a RS, MUP-a Kantona Sarajevo i Brčko Distrikta, izvršeno je 28 pretresa objekata, te su slobode lišene 22 osobe, koje se dovode u vezu sa izvršenjem krivičnih djela ubistva Borisa Govedarice, Vlatka Mačara, Milana Vlaškića i Rada Magazina, pokušaj ubistva Đorđa Ždrala, razbojništvo PBS Banka i BH Pošta, izazivanje opće opasnosti, pranje novca i drugih krivičnih djela definiranih krivičnim zakonima BiH i entiteta.



Naknadnim aktivnostima policijskih službenika SIPA-e, MUP-a RS i MUP-a Kantona Sarajevo, u saradnji sa Tužilaštvom BiH, lišeno je slobode još deset osoba, te je rasvijetljeno krivično djelo ubistvo Zorana Goluba u Istočnom Sarajevu i krivično djelo razbojništvo nad transportom novca „Pavlovic International bank“ u Han Pijesku i poslovnici „Nove Banke AD Bijeljina“ u Istočnom Sarajevu.

Istraga u predmetu „Lutka“ trajala je do 28.8.2013. godine, kada je tužilac Posebnog odjela za organizirani kriminal, privredni kriminal i korupciju Tužilaštva BiH, podigao optužnicu protiv 32 osobe – pripadnike organizirane kriminalne grupe Darka Eleza, Bojana Cvijana i Anesa Kurbegovića, koji su u periodu od 2005. do 2009. godine na području Sarajeva i Istočnog Sarajeva počinili veliki broj najtežih krivičnih djela inkriminiranih krivičnim zakonima BiH i entiteta Republika Srpska i Federacija BiH.

Optuženi se, između ostalog, terete za:

1. teško ubistvo Borisa Govedarice, počinjeno u augustu 2007. godine, kod tržnog centra u Lukavici. Ubistvo je izvršeno pucanjem u žrtvu iz automatskog oružja, odnosno iz dvije automatske puške, sa više od 15 metaka, što je dovelo do trenutne smrti. Navedeno ubistvo izvršeno je na raskrsnici u prometnoj ulici, čime je izazvana velika opasnost za sigurnost građana.



2. teško ubistvo Vladimira Mačara počinjeno u januaru 2008. godine na Palama, eksplozivnom napravom, namontiranom na ranije ukradeno vozilo. Ovom prilikom smrtno je stradala još jedna osoba, Milan Vlaškić, a teško je ranjen slučajni prolaznik Rade Magazin, koji je od teških povreda naknadno preminuo u KC Istočno Sarajevo, dok je više osoba ranjeno.



3. teško ubistvo Zorana Goluba u augustu 2008. godine u ugostiteljskom objektu "Sport" u Istočnom Sarajevu. Imenovani je lišen života tako što je na njega iz dvije automatske puške ispaljeno više od 40 metaka, čime je, osim izvršenog ubistva, izazvana velika opasnost po živote svih prisutnih osoba.



4. dogovor, planiranje i dva pokušaja ubistva Đorđa Ždrale tokom 2006. godine na području Istočnog Sarajeva. Pucanjem iz vatrenog oružja Đorđe Ždrale je prilikom prvog pokušaja ubistva teško ranjen sa više hitaca.
5. pljačku novca "Pavlovic International bank" iz Bijeljine, koja je počinjena u avgustu 2005. godine, na području Han Pijeska, presretanjem vozila koje je prevozilo novac, kada je otuđeno oko 1,8 miliona KM.
6. pokušaj pljačke novca „Nove Banke“ AD Bijeljina, poslovnica u Istočnom Sarajevu, u novembru 2005. godine, u iznosu od oko 2,2 miliona KM. Zaštitari koji su prevozili



novac, nakon što je na njih pucano, upotrijebili su oružje i u razmjeni vatre ranili pljačkaše, poslije čega su izvršioци побјегли u pravcu Sarajeva.

7. pljačku novca "Privredne banke Sarajevo", u iznosu od 2,2 miliona eura (oko 4,4 miliona KM), koja je počinjena u naselju Nedžarići u Sarajevu, u junu 2006. godine, kada je opljačkano vozilo kojim je novac prevožen na aerodrom.



8. oružanu pljačku oko 670.000 KM, iz BH Pošte, poslovnica Pošta 2 u Sarajevu, u junu 2008. godine, kada su se nakon pljačke počinioci udaljili kombijem, koji su nakon toga zapalili.



U toku rada na dokumentiranju kriminalnih aktivnosti ove organizirane kriminalne grupe, SIPA je ostvarila visok nivo policijske i druge međuinstitucionalne saradnje na nivou Bosne i Hercegovine, posebno sa Tužilaštvom BiH, Ministarstvom unutrašnjih poslova Republike Srpske, MUP-om Kantona Sarajevo, Graničnom policijom BiH i drugim institucijama i relevantnim organima BiH i regiona, posebno sa MUP-om i Tužilaštvom R. Srbije, kao i sa zemljama Zapadne Evrope, u okviru čega prednjače SR Njemačka i R. Austrija. Ova saradnja i dalje traje i svakim danom donosi nove rezultate u smislu dokazivanja krivičnih djela, kao i u dijelu koji se odnosi na potvrđivanje uloge SIPA-e kao lidera među policijskim agencijama u Bosni i Hercegovini i prvog partnera kada je u pitanju međunarodna policijska saradnja.

Napominjemo da je organizirana kriminalna grupa Darka Eleza dugi niz godina djelovala na području Bosne i Hercegovine i zemalja regiona, svakodnevno vršeći brojna



krivična djela, na osnovu čega su stekli veliku imovinsku korist, što im je omogućilo ostvarivanje uticaja na strukture vlasti, od lokalnog do državnog nivoa, te na pojedince iz policijskih institucija i medija, te je pretvorilo u jednu od najorganiziranijih kriminalnih grupa u regionu i šire. Ova kriminalna grupa je svakim danom jačala, ističući se u surovosti i beskrupuloznosti i prijetila da se izdigne iznad sistema, te nanese ozbiljne posljedice po sigurnost građana i društva u cjelini. Samim tim, djelovanje policijskih službenika u datim okolnostima iziskivalo je dodatne napore u cilju konspirativnog i sigurnog preduzimanja potrebnih mjera i radnji, te povjerljivog raspolaganja informacijama koje se tiču planiranja i realiziranja aktivnosti usmjerenih na razbijanje ove kriminalne grupe.

Ovom operativnom akcijom rasvijetljena su najteža krivična djela koja su počinili pripadnici kriminalne grupe Darka Eleza, a koji su duži vremenski period vršili presiju na javnost i sigurnosno-policijske strukture u Bosni i Hercegovini.

U okviru predmeta kodnog naziva „Lutka“ optuženi su:

Darko Elez, Bojan Cvijan, Benan Dorić, Davor Mandić, Branimir Minić, Vladimir Pandurević, Vaso Ljubibratić, Muhamed Ramić, Sead Robović, Edin Ahmetspahić, Davor Elez, Ljubiša Lalović, Marko Krajišnik, Slobodanka Tošić, Himzo Ćato, Dejan Vukosavljević, Nermin Tahirović, Elvira Kajević, Azim Kajević, Mehmed Kajević, Elvis Zlatić, Admir Ahmetspahić, Dragan Vujičić, Vladan Parađina, Dragan Jevtović, Benjamin Halilović, Milan Mitić, Dragan Obućina, Anes Kurbegović, Milosav Vesković, Slaviša Bobar i Mladen Mičin.

Sud Bosne i Hercegovine potvrdio je 4.9.2013.godine optužnicu u predmetu Darko Elez i drugi. Važno je istaći da je ovom operativnom akcijom SIPA-e zadat neizdrživ udarac organiziranom kriminalu na području Bosne i Hercegovine, te da je razbijena najveća kriminalna grupa u postdejtonskoj Bosni i Hercegovini.